

SARS E HLOTSE NYEWE YA HO QOBA TEFO YA LEKGETHO YA BOKAALO BA R1-BILLION

Pretoria, Labone, 28 Pudungwana 2019 — Ditshebeletso tsa Lekgetho tsa Afrika Borwa (SARS) di ananela kahlolo ya Lekgotla le Phahameng la Maipiletso (SCA) e entseng hore kganyetsano e nkileng nako e telele ya Africa Cash & Carry e fihle pheletsong.

E meng ya metheo ya bohlokwa ya molao eo SCA e entseng qeto ka yona, e akaretsa matla ao Lekgotla la Lekgetho le nang le ona mabapi le ho tlisa diphetoho tsa dihlahlobo tlasa karolo ya 29(2)(b) ya Molao wa Taolo ya Lekgetho, wa 28 wa 2011 ("TA Act") ho fapana le matla a ho hlakola hlahlobo ho SARS ho latela dintlha tsa karolo ya 129(2)(c) Molao wa Taolo ya Lekgetho mmoho le botoloki ba seo SARS e lokelang ho se etsa ha ho lokela hore pakahatswe hore hlahlobo e lohothwang ke e utlwalang kapa tjhe.

Kahlolo ena ya la 21 Pudungwana 2019 e tla ka mora phuputso e entsweng ke SARS mabapi le tshebediso ya mekgwatshebetso e sa taloleng tsohle mabapi le dithekiso mmoho le ho sebediswa hampe ha dibuka tsa diakhaonto. Diphuputso tsena di hlalositse hore ho na le ho se tsebahatswe kaofela ha dithekiso mmoho le tshebediso e mpe ya dipalo tsa setoko tse bakileng hore ho se talolwe tsohle tse mabapi le lekgetho la lekeno le akantsweng mmoho le dihlahlobo tsa VAT, e leng tse neng di hanyetswa ke molefalekgetho. Lekgotla la Lekgetho le ile la etsa ditokiso tsa dihlahlobo mme molefalekgetho yena a ikgethela ho sebedisa tokelo ya hae ya ho ipiletsa ho SCA.

SCA e dumellane le taelo ena ya Lekgotla la Lekgetho, eo hara tse ding e tlisitseng ditokiso tsa dihlahlobo mme ya tiisa ho tliswa ha lekgetho la tlatsetso la 200%. SCA e qheletse ka thoko boipiletso ba molefalekgetho mme ya ntsha taelo ya hore ditjeo tsohle tsa molao tsa SARS di leshwe.

SARS e ikemiseditse ho lwantshana le diketso tsa ka boomo tsa ho qoba tefo ya lekgetho. SARS e kgathaditswe ke maemo a boikobelo ba tefo ya lekgetho ka hara indasteri ya *Cash & Carry* haholoholo ka ho qolleha dikema tse kang tsa "*Ooplang*" tse kentseng tse tsejwang e le "*Ghost Exports*", ho se rekotwe ha dithekiso tsa moya wa diselfounu, tshebediso e mpe ya diakhaonte tsa dikadimo, ho tsekwa ha di-invoese tsa VAT tsa mokunyata ka sepheo sa ho tseka tse mabapi le Lekgetho la Lekenno, tshebediso ya dikhampani tsa mokunyata ho iketsetsa di-invoese mmoho le mekgwatshebetso e sa taloleng tsohle mabapi le dithekiso tse entsweng.